

Durante Sail Aruba 2015

Oportunidad unico di wak e obra musical 'Soldaat van Oranje'

ORANJESTAD - Soldaat van Oranje - De Musical, e obra musical cu trayectoria largo na Hulanda, lo presenta diabierna 1 di mei na Aruba.

Na ocasion di Sail Aruba ta bay presenta pa solamente un biaha, un version special di e obra na waf di Oranjestad, caminda tambe ta haci mencion di un poesia dedica na e heroe di resistencia Arubiano, Boy Ecury. Rey Willem-Alexander y Reina Máxima lo ta presente e anochi aki.

Su Excelencia Gobernador di Aruba, Fredis Refunjol, a yega di wak e presentacion un par di biaha na Hulanda. Tabata su deseo pa pueblo di Aruba tin oportunidad di wak Soldaat van Oranje - De Musical, un storia di Erik Hazelhoff Roelfzema y historia di Dos Guerra Mundial caminda Aruba tambe a hunga su papel. E obra ta hopi mara na e alocacion di e anterior pista di avion Valkenburg na Katwijk, de Theater Hangar, caminda a

construi un tribuna giratorio. Pa di tur manera por a conta e storia aki di guerra, a haya un manera diferente. Den waf di Oranjestad ekipo di Soldaat van Oranje - De Musical ta bay haci un presentacion special di solamente un anochi. A haci un collage di poesia y fragmentonan di texto di e literatura di e Segunda Guerra Mundial. Naturalmente e actornan ta hunga nan personahe y ta canta algun di e escena y temanan di e musical tambe. E obra musical ta wordo pre-



senta, canta y hiba na bida dor di ex miembronan di e elenco. E Zeemanskoor Aruba ta sostene e elenco cu esaki. E storia ta hunga durante Segunda Guerra Mundial. Ora e Alemannan na 1940 a invadi Hulanda, e estudiante di Leiden Erik Hazelhoff Roelfzenma cu su amigonan tabata hiba un bida sin preocupacion. E tempo ey, rond di nan 23 aña, e grupo di hoben di repenti a realisa cu nunca nada lo ta mescos. Amistad y amor no ta algo normal mas. Guerra a bolter tur cos, y cada un den su proporcion. Cada ken mester tuma su mesun decisionnan... Bo ta bay lucha pa Libertad, Pueblo y Patria? Bo ta sconde bo cabes den tera y sigui studia? Of bo ta scoge pa tuma banda di enemigo? Soldaat van Oranje - De Musical ta basa riba e storia di bida real di un di e heroenan mas grandi di resistencia di nos madre patria su historia: Erik Hazelhoff Roelfzema. Na comienso di guerra, Erik ta huy bay Inglatera di unda e ta transporta aparatonan di transmision di manera ilegal y ta wordo emplea como piloto den bombardeonan riba Alemania. E ta bira ayudante di Reina Wilhelmina y ta ricibi pa su sacrificionan di resistencia durante guerra e Militaire Willemsorde, e distincion Real di mashaltocutin. Su buki famoso, Soldaat van

Oranje a bira un pelicula na 1977 cu Rutger Hauer den e papel principal y despues desasaroya den un musical. Bou direccion di Theu Boermans y basa riba script di Edwin de Vries e actornan ta hunga rond di un tribuna giratorio, riba e musica di Tom Harri-man cu textonan di Pamela Phillips Oland y Frans van Deursen. Asina e storia extraordinario aki ta haya bida. Den e presentacion na Aruba, productor Fred Boot y director Theu Boermans lo ta presente. Actornan Matteo van der Grijn, Boy Ooteman, Kevin Schoonderbeek, Jorrit Ruijs, Raymond Paardekooper, Linde van den Heuvel, Sylvia Poorta y Noel S. Keulen ta forma e elenco. Pa mayoria di nan, esaki ta prome biaha cu nan ta bishita nos isla. Nan estadia ta posibel danki na e patrocinacion di entre otro, Divi Resorts. E presentacion ta tuma luga den un teatro cu ta wordo construi specialmente pa e ocasion aki riba tereno di waf di container. Tin capacidad pa 2 mil persona, 1.500 riba e parti abou y 500 riba e balcon. Fuera di esey, e teatro lo conta cu un palco Real pa ricibi e invitadonan special. Carchinan pa e musical aki ta costa 10 Florin y ta obtenibel na Unoca, Super Food y Cas di Cultura. E obra aki ta destina pa personanan riba 10 aña di edad. □

CARIBBEAN SPEED PRINTERS N.V.

BON DIA *Aruba* TODAY BUENOS DIAS *Aruba*

Weststraat 22, Oranjestad, Aruba • Tel: 5827888

Masha Pabien

Rey Willem Alexander

En su Majestad su Aniversario